

集解裴駟曰凡是徐氏義稱徐姓名以別之餘  
者悉是駟註解并集衆家義索隱紀者記也本  
其事而記之故曰本紀又紀理也絲縷有紀而  
帝王書稱紀者言為後代綱紀也正義鄭玄注  
中候勅省圖云德合五帝坐星者稱帝又坤靈  
圖云德配天地在正不在私曰帝按太史公依  
世本大戴禮以黃帝顓頊帝嚳唐堯虞舜為五  
帝譙周應劭宋均皆同而孔安國尚書序皇甫  
謐帝王世紀孫氏注世本並以伏羲神農黃帝  
為三皇少昊顓頊高辛唐虞為五帝裴松之史  
目云天子稱本紀諸侯曰世家本者繫其本系  
故曰本紀者理也統理衆事繫之年月名之曰  
紀第者次序之目一者舉數之由故曰五帝本  
紀第一禮云動則左史書之言則右史書之左  
陽故記動右陰故記言言為尚書事為  
春秋按春秋時置左右史故云史記

黃帝者

集解徐廣曰號有熊索隱按有土德之瑞土色黃故稱黃帝猶神農火德王而稱炎帝然也此

以黃帝為五帝之首蓋依大戴禮五帝德

少典之子姓公孫名曰軒轅。